

Un rat'i ora cu Tanta Dora

Tempo di Plantamento 2



Com bai muchanan? Com boso a pasa herfstvakantie? Nos ta sigi cu nos storia tocante plantacion. Awor cu awa a jobe boso a planta algo? Pidi Papa of Mama duna boso pida tera den curá pa boso por planta por ehempel: tomati of promenton. Nan ta bira grandi lihé y no mester di hopi cuida. Solamente awa cu solo. Esnan cu no tin tera den curá por planté den un bleki of pochi di mata basta grandi.

Laga nos bam mira com ta pará cu nos cosecha. E boonchinan ta tur na flor y cu **baliña** chikito. Baliña ta e casca den cual e boonchi ta crece. Nos conocé hopi sorto di boonchi manera: Boonchi plat, boonchi curijn, boonchi wowo preto (esey ta pasobra e ta blanco cu preto), boonchi largo (pasobra su baliña

ta largo), boonchi duro (su casca ta duro), boonchi prinses (pasobra e ta chikito, rondó masha bunita mes). E mata di e boonchinan aki no ta crece haltu. Pero nos tin tambe boonchi bonofis y esaki si mester un luga pa e por rama. Sea na waya of na **trankera**. Trankera ta trahá di kadushi, un banda di otro y ta pone un **bara** pa nan keda recht. Bara ta un taki di mata, sea di watapana, di kwihi of di mata di kawara. E no mester ta hopi **korkobiá** (sin bocht grandi), pero basta recht. Pa pone nan banda di otro mester wanta e kadushinan cu un **cuero di kadushi**. Esaki ta un pida largo di cuero di carné. Nan ta seké na solo, doble parobez y cosé na otro. E cuero ta keda diki y sumpiña no ta drenté.

Tambe nos ta usa un **chi-cu-chá**. Esaki ta un herment den forma di un 'Y' pa stut e kadushi.

Tambe tin boonchi kinchoncho, esaki ta bira un mata hopi haltu y nos ta herebé berde pa come como salada banda di carni of pisca. Por cushiné tambe.

Nos patía, pampoena y milon ta na flor. Nos tin cu **bacuná** e pampoena p'e por pari lihé. Esey ta net un trabao pa mucha. Tempran nos ta bai den kunuku pa wak cuanto flor e pampoena su rama tin. E ta pone hopi flor, pero mayor parti ta **flor falso**. Esakinan no ta pari pampoena. E flor falso ta 'meeldraadbloemen' y e flor cu ta pari pampoena ta 'stamperbloemen'. Esey boso ta haya na scol den natuurskole- y plantkundeles.

Nos ta kibra e flor falso na su steel y ta biré boca abao riba e flor cu ta pari pampoena. Normal ta insectonan ta haci esey, pero nos ta yuda nan. Claro cu casi tur dia bo ta bai wak com grandi bo pampoena ta y bo ta mashá orguyoso di mira com e ta crece.

E maishi rabunan ta na **barica**. Esey kier meen cu nan ta mas of menos un meter haltu, haltura di un hende su barica.

Ora nan ta banda di dos meter haltu nan ta saca na nan top un fojo so y nos ta bisa e ora cu e maishi ta na **bandera**. Despues e ta saca su **tapushi** (caminda e boshi di maishi ta sali). Otro biaha mi ta sigi conta di e maishi y tambe mi ta bai conta boso con antes nos tabata celebrá Pascu di Nacemento. Ta hopi interesante pa boso sa algo di antes. Pascu ta **tras di horea**, nos ta bisa. Esey kier meen djies aki. Haci boso best na scol pa boso rapport sali bon, esey ta un bon regalo di Pascu pa boso mayornan. Muchanan, te un otro biaha.



Tanta Dora.



CHABALITO

Number 3 - Año 2 - November, 1999 - Afl. 2,=

